

KOMUNIKADO DI PRENSA

Seshon futuro koperashon periodístiko den Reino, supsidio pa binti periodista traha huntú: promé resultadonan di e Programa Karibense di Fondo BJP.

Amsterdam, 26 di ougùstùs – Un seis luna despues ku Wensly Francisco i Joëlle Terburg a realisá nan biahe di trabou na e Islanan Karibense den Reino, patrosiná pa Fondo BJP (Fonds Bijzondere Journalistieke Projecten), e promé resultadonan di nan biahe ta birando visibel. Durante e biahe nan a bishitá sinku isla: Aruba, Kòrsou, Sint Maarten, Boneiru i Saba. Kada un di e enkuentronan na e diferente islanan a atraé hopi públiko i a kondusí na kòmbersashonnan balioso riba reto i oportunidatnan den periodismo.

Binti publikashon ku kontenido ekstenso i independiente

For di ougùstùs, alrededor di binti periodista ta trahando ku sosten finansiero di Fondo BJP riba diferente investigashon i publikashon. Durante e biahe di trabou ya menshoná, tabatin un ronda di presentashon tokante posibilidatnan di subsidio spesífikamente destiná pa periodista karibense, ku tabata hopi bon bishitá. Ademas a asigná partinan di e fondo na diferente proyekto.

E subsidio risibí ta pèrmití e periodistanan konserní pa investigá i profundisá independientemente riba temanan importante, manera por ehèmpel klima relatá na maneho di gobièrnu i turismo, loke normalmente no ta haña masha espasio den e periodismo lokal di e islanan. Esnan responsabel pa kada un di e proyektonan akí, ta konektá ku otro komo ‘sparring partner’ – sea un kolega prosedente di Hulanda òf un kolega prosedente di un isla karibense – , ku huntú ta pensa i kolaborá pa ehekutá un plan periodístiko.

“Pa un bon funshonamentu di demokrasia un periodismo fuerte i independiente ta esensial. Ku e kontribushonnan finansiero akí, nos di Fondo BJP por kontribuí pa asina periodistanan na e islanan por desempeñá e papel esensial akí. Kreando posibilidat pa periodistanan traha huntú komo sparring partner, nos ke aportá na mas interkambio i kooperashon – algu importante pa kualke periodista –, pero di sumo importansia pa esnan ku ta traha den komunidatnan chikitu”, segun e inisiadónan di e proyekto Wensly Francisco i Joëlle Terburg.

Primisia dia 12 di sèptèmber

Ademas, dia 12 di sèptèmber, Fondo BJP ta organisá un primisia eksepsional: periodista i kreadó di notisia di Hulanda i di e Islanan Karibense den Reino lo topa otro den un programa konhuntú. E seshon lo tuma lugá na Deventer durante e Festival di Periodismo den Reino Hulandes, miéntras ku e lo brinda tambe un

okashon pa periodista di Islanan Karibense i di Hulanda topa otro pa kompartí konosementu i interkambiá nan eksperensia i historia, loke lo stablesé – nos ta spera – un base pa mas kolaborashon den futuro. Pasobra, aunke ta asina ku nos tur den Reino Hulandes ta praktiká periodismo na nos manera, nos por kooperá ku otro pa asina kompartí nos konosementu i reforsá otro.

Importansia pa periodismo den Reino

E sosten finansiero pa proyekto i e enkuentro menshoná ta forma parti di un maneho mas ekstenso di Fonds Bijzondere Journalistieke Projecten (Fondo BJP). E fondo a comprometé su mes pa fortalecé sektor di periodismo, desaroyá konosementu profeshonal i otorgá supsidio na proyektonan ku ta bin na remarke. Fondo BJP ta konsiderá e promé resultadonan di e esfuerso hasí komo un paso importante pa yega na un sektor periodístiko mas sólido, resiliente i konektá den Reino Hulandes henter. Kompartiendó konosementu, konstruyendo lasonan di union i apoyando kreadónan di kontenido notisiero aktivamente, e fondo akí no solamente ta fortalecé e kalidat di periodismo, sino tambe ekstendé diversidat di e storianan ku ta keda kontá.

“E promé resultadonan ta demostrá ku ta eksistí un gran nesesidat pa periodismo independiente i di kontenido ekstenso na e islanan, i ku tantu na e Islanan Karibense komo na Hulanda tin bastante interes pa interkambio, enkuentro ku otro i kolaborashon. A traves di e proyektonan ku ta den tapara i e seshon na Deventer, nos ke sigui kontribuí pa ekstendé talentonan den periodismo i konstruí asina lasonan di kolaborashon duradero den henter reino,” asina Wensly Francisco i Joëlle Terburg a trese dilanti. “Nos kompromiso ta pa sigui desaroyá kalidat di periodismo ainda mas den Reino henter.”

Bo ke mas informashon?

Esun ku ke keda na altura di futuro aktividat- i desaroyonan riba e tereno akí, por inskribí pa risibí e boletin di Fondo BJP, òf sigui nos na Instagram òf LinkedIn.

— FIN DI KOMUNIKADO —

Nota pa redakshon:

Pa pregunta, entrevista òf material visual por tuma kontakto ku: Joëlle Terburg, direktor-atministradó di Fondo BJP, tel: +31 6 15302992, j.terburg@fondsbjp.nl òf

Wensly Francisco, eksperto afiliá na e Programa Karibense di Fondo BJP, tel: +31 6 42421887, w.francisco@fondsbjp.nl